



Une dì, a pene finît di gustâ, o 'nd ai vude la pensade di lâ a fâ un zîr su “las rives” che a son a nort dal paîs di Gjalarian, dulà che tu cjatis i rescj di une ete antighe; si pense de ete dal bronz.

Jere une zornade une vore cjalde, ancje se si varès podût pensâlu, stant che a jerin in plene Istât. Ma dut chel scjafoiaç al jere une robe mai provade prin di cumò.

Lant dilunc pe semide, che e tache a çampe dal cimitieri e e finis dongje des rives, dopo vê cjaminât un toc cence vê nancie une plante a fâ un tic ombre, o soi rivât tal fresc di un passaç infra mieç di une boschete.

Mi pareve di sei jentrât intun toc di paradîs. A ôr de tiere al svoletave e al cjantuçave un rusignûl, jenfri dai baraçs e de cjarande.

Pôc plui in là un sghirat si rimpinave suntun barancli, al jere cussi svelt che al sarès bastât che jo o ves zirât il voli par un moment che lu varès subite pierdût di viste.

Finît chest troi o jeri fûr tal soreli, tornât in plen scjafoiaç. *Ancjemò cuatri pas o pensavi e o rivi denant chel rialç dal teren di trê o cuatri metris che tu capissis di jessi rivât su “las rives”.*

La cjaminade e la calure a stevin fasint il lôr efiet, o 'nd ai cirût un tic di ombrene e mi soi distirât su chê jerbe plene di sêt. Sierâts i voi o jeri bielzà tal mont dai siums... Doi a cjaival cul cjapiel di fiêr e cul scût suntun braç par difindisi; inta chê altre man a tignivin dure une

spade.

Cuntune vòs che ti faseve tremâ ancje il sanc intes venis, un dai doi al veve vosât cuatri peraulis in latin, cuatri legjonaris a son partîts al galop su pes rives, un par cjanton su chel rialç di difese. Daspò o ‘nd ai sintût il sdrondenament dai tambûrs e pôc dopo si son presentâdis lis trupis cence cjavai.

A someavin tantis marionetis, tant ben che si movevin ognidun a fâ il so compit.

Intun moment ve li l’acampament di tendis, dutis ben metudis in rie nancje che a vessin vût un teodolite par rivâ a metilis cussì dretis, file par file, cu lis stradis par jentrâ in ogni tende, cence intrigâi a nissun.

Il rumôr di un tratôr mi a disveât e cussì no soi rivât a viodi chel legjonari di non Galerio che une conte nus dîs che al à dât il non al paîs di Gjalarian.

***di Plume di Ingjustri***